

Na osnovu člana 16. stav 5. Zakona o veterinarstvu ("Službene novine Federacije BiH", broj 46/00), federalni ministar poljoprivrede, vodoprivrede i šumarstva donosi

PRAVILNIK

O OBAVEZNOM OZNAČAVANJU I UPISU U JEDINSTVENI REGISTAR OVACA, KOZA I SVINJA TE VOĐENJU EVIDENCIJA

I. OPĆE ODREDBE

Član 1.

Ovim Pravilnikom utvrđuje se jedinstveni sistem označavanja ovaca, koza i svinja, te način vođenja jedinstvenog registra istih te propisanih evidencija.

Član 2.

Radi provođenja mjera zaštite zdravlja ljudi i životinja od zaraznih i nametničkih bolesti te sljedivosti proizvoda životinjskog porijekla sve ovce, koze i svinje u Federaciji Bosne i Hercegovine (u daljnjem tekstu: Federacija) moraju se označiti u skladu sa odredbama ovog Pravilnika a svako premještanje ovaca, koza i svinja mora se evidentirati u Jedinstveni registar domaćih životinja na način koji omogućuje identifikaciju gazdinstva sa kojeg su došle i na kojem su rođene.

Član 3.

U smislu ovog Pravilnika pojmovi koji se koriste imaju slijedeće značenje:

1. **Vlasnik** - svako fizičko ili pravno lice, koje se koristi životinjom, istu posjeduje i s njom raspoložuje.
2. **Jedinstveni registar domaćih životinja** (u daljnjem tekstu: Registar) - osnovna baza podataka o domaćim životinjama u Federaciji, koji vodi Federalni agromediteranski zavod Mostar (u daljnjem tekstu: Zavod), u elektronskom obliku.
3. **Ovlaštena organizacija odnosno fizičko lice za označavanje domaćih životinja** - pravno odnosno fizičko lice koje je ovlašteno od Federalnog ministarstva poljoprivrede i šumarstva (u daljnjem tekstu: Federalno ministarstvo) za obavljanje navedene djelatnosti u skladu sa propisima.
4. **Obavezna dokumentacija za označavanje** - svi obrasci propisani ovim Pravilnikom.
5. **Označena životinja** - svaka domaća životinja koja je označena na način propisan ovim Pravilnikom.
6. **Ponovno označavanje** - postupak kojim se domaća životinja koja je izgubila oznaku ponovo označi na način propisan ovim Pravilnikom.
7. **Potvrda o označavanju** - dokument koji životinja dobiva prilikom označavanja, izdaje se jednom za pojedinu životinju i prati je prilikom prometa.

Član 4.

Posjednik domaće životinje odgovoran je da je svaka pojedina domaća životinja, odnosno cijelo stado, označeno na način propisan ovim Pravilnikom.

Član 5.

Označavanje životinja obavljaju veterinarske organizacije koje ovlašćuje Federalno ministarstvo na prijedlog Zavoda.

Ukoliko ovlaštena organizacija ne obavlja povjerene poslove u skladu sa propisima i uputama Federalnog ministarstva, istoj će se prvo ukazati na obavezu vršenja povjerenih ovlaštenja, a zatim će se ti poslovi povjeriti drugim pravnim licima koja ispunjavaju uslove.

Član 6.

Ovlaštena pravna i fizička lica iz člana 5. ovog Pravilnika moraju voditi propisanu evidenciju označenih životinja.

Nakon označavanja ovlaštena organizacija posjedniku životinje izdaje propisanu potvrdu o označavanju.

Potvrda iz stava 2. ovog člana služi kao dokaz o identitetu životinje i prati je u unutrašnjem prometu.

Ovlaštene veterinarske organizacije i posjednici životinja, nakon označavanja životinja unose podatke u svoju evidenciju, a obrazac sa podacima o životinji i broju ušne markice dostavljaju Zavodu u roku od sedam dana. Zavod je obavezan u roku sedam dana izdati potvrdu o označavanju.

Zavod unosi podatke o označenim životinjama u Registar.

Član 7.

Izdavanje i distribuciju ušnih markica, potrebnih sredstava za obavezno označavanje životinja te propisanih obrazaca obavlja Zavod.

Distribucija ušnih markica ovlaštenim veterinarskim organizacijama obavlja se prema dinamici narudžbe.

Zavod vodi evidenciju o distribuciji markica i dokumentacije za označavanje, na propisanom obrascu, a Federalnom ministarstvu dostavlja mjesečne izvještaje o distribuciji ušnih markica i izdavanju propisane dokumentacije.

Član 8.

Registar vodi Zavod, i to za pojedine vrste domaćih životinja.

Podaci o uzgojno valjanim životinjama unose se i u Centralni upisnik uzgojno valjanih grla koji vodi Zavod.

Podatke koji se upisuju u Registar od strane Zavoda dostavljaju:

- ovlaštene veterinarske organizacije,
- nadležni veterinarski inspektori koji obavljaju obavezne veterinarsko-zdravstvene preglede u objektima registrovanim za klanje životinja,
- uzgojno selekcijske službe kantona.

Pristup Registru radi pregleda podataka imaju:

- Federalno ministarstvo,
- Ovlaštene veterinarske organizacije,
- Zavod,
- Federalna poljoprivredno savjetodavna služba (u daljnjem tekstu: FPSS),
- Centri za reprodukciju.

Na osnovu podnesenog posebnog zahtjeva, Federalno ministarstvo može odobriti pristup Registru i drugim korisnicima.

Praćenje i kontrolu vođenja Registra obavlja Federalno ministarstvo-Sektor za veterinarstvo.

Član 9.

U objektima registrovanim za klanje životinja, evidenciju o klanju vode nadležni veterinarski inspektori odnosno ovlašteni veterinari u skladu sa Odlukom o veterinarsko-zdravstvenom pregledu i kontroli životinja prije klanja i proizvoda životinjskog porijekla ("Službeni glasnik BiH", broj 82/06), pri čemu moraju ušne markice i potvrde o označavanju poništiti i razdužiti kod Zavoda.

Posjednik životinje mora odmah izvijestiti nadležnu ovlaštenu veterinarsku organizaciju o uginuću označene životinje, a s ušnom markicom i dokumentacijom ovlaštena veterinarska organizacija postupa u skladu sa stavom 1. ovog člana.

Nadležna veterinarska inspekcija odnosno ovlaštene veterinarske organizacije, moraju voditi evidenciju o klanju odnosno uginuću životinja na propisanom obrascu, i o tome izvijestiti Zavod jedanput sedmično za prethodnu sedmicu kako bi ti podaci bili unijeti u Registar.

Član 10.

Uvezene životinje namijenjene klanju ne podliježu obilježavanju propisanom ovim Pravilnikom.

Član 11.

Uvezenim domaćim životinjama, ako su označene u skladu s ovim Pravilnikom, ostaje nepromijenjena izvorna oznaka životinje iz zemlje porijekla.

Domaće životinje iz stava 1. ovog člana nije potrebno dodatno označavati te se izdaje potvrda o označavanju, a podaci se unose u Registar.

Domaće životinje koje nisu označene u skladu s ovim Pravilnikom moraju biti označene, evidentirane i upisane u Registar prije raspuštanja karantene, na način propisan ovim Pravilnikom.

U slučaju da domaća životinja izgubi izvornu ušnu markicu zemlje porijekla, potrebno je ponovno označiti ušnom markicom propisanom ovim Pravilnikom te izdati novu potvrdu o označavanju, na kojoj se označava stari životni broj životinje.

Član 12.

Propisane ušne markice mogu se koristiti samo od ovlaštenog proizvođača, a u skladu sa kriterijima iz Priloga (1., 2. 3. i 4.) ovog Pravilnika.

Propisane obrasce i dokumentaciju za označavanje životinja može štampati samo od Federalnog ministarstva ovlaštena štamparija, koja mora numerisati obrasce te voditi evidenciju o proizvedenim i distribuiranim količinama.

II. OZNAČAVANJE SVINJA

Član 13.

Svinje se označavaju ušnim markicama sa životnim brojem (Prilog 1.), koje se stavljaju na desno uho.

Uzgojno valjane životinje mogu se dodatno označiti tetoviranjem u lijevo uho.

Član 14.

Životni broj je jedinstveni broj od 10 znamenki, koji se sastoji od broja entiteta koji je za Federaciju BiH 2 i sljedeće dvije znamenke su oznake kantona i tekućeg dijela broja.

Član 15.

Označavanje grla ušnom markicom obavlja se po prijavi vlasnika, prilikom provođenja imunoprofilaktičkih mjera, a najkasnije prije stavljanja grla u promet.

Član 16.

Nakon obavljenog označavanja, ovlaštena organizacija za označavanje izdaje posjedniku životinja potvrdu o označavanju (Prilog 3.).

Potvrda o označavanju izdaje se u 3 primjerka. Prvi primjerak namijenjen je ovlaštenoj organizaciji za označavanje, drugi primjerak potvrde dostavlja se Zavodu, a treći primjerak ostaje posjedniku i služi kao dokaz o identitetu životinje.

Član 17.

Potvrda o označavanju svinja sadrži sljedeće podatke:

- zemlja porijekla,
- životni broj grla,
- datum rođenja grla,
- spol,
- broj majke (ako je poznata),
- broj oca (ako je poznat),
- podatke o vlasniku/posjedniku (ime i prezime, adresa, šifra gazdinstva),
- datum označavanja,
- potpis ovlaštenog djelatnika i otisak pečata ovlaštene organizacije.

Član 18.

Prilikom klanja svinja za potrebe vlastitog domaćinstva, posjednik mora, uz propisani uzorak za pregled mesa na trihinelozu, dostaviti ovlaštenoj veterinarskoj organizaciji i ušnu markicu zaklane životinje.

Član 19.

Posjednik svinja obavezan je voditi registar svinja na gazdinstvu te sve promjene evidentirati u roku od sedam dana od nastale promjene.

Registar iz stava 1. ovoga člana sadrži sljedeće podatke:

- ime i prezime vlasnika/posjednika životinje, šifru gazdinstva,
- životni broj životinja,
- podatke o prometu životinja (datum stavljanja životinja u promet, broj životinja koje se stavljaju u promet, novo brojno stanje).

III. OZNAČAVANJE OVACA I KOZA

Član 20.

Ovce i koze označavaju se ušnom markicom (Prilog 2.), u desno uho, a uzgojno valjane životinje i tetoviranjem u lijevo uho.

Označavanje grla ušnom markicom obavlja se po prijavi posjednika, prilikom provođenja imunoprofilaktičkih mjera, a najkasnije prije stavljanja grla u promet.

Član 21.

Nakon označavanja ovlaštena organizacija izdaje i ovjerava potvrdu o označavanju (Prilog 4.), koja sadrži slijedeće podatke:

- zemlja porijekla,
- životni broj životinje,
- vrstu životinje,
- pasminu životinje,
- spol životinje,
- datum rođenja (ako je poznat),
- životni broj majke (ako je poznat),
- životni broj oca (ako je poznat),
- ime i prezime vlasnika životinje, adresu te jedinstveni matični broj,
- ime i adresu posjednika životinje te jedinstveni matični broj,
- podaci o organizaciji i licu koje je označilo životinju,
- datum označavanja životinja,
- potpis lica koje je obavilo označavanje.

Potvrda o označavanju izdaje se u tri primjerka. Prvi primjerak namijenjen je ovlaštenoj organizaciji za označavanje, drugi primjerak potvrde dostavlja se Zavodu, a treći primjerak ostaje posjedniku.

Nakon označavanja, podaci o označenoj životinji upisuju se u Registar.

Član 22.

Posjednik ovaca odnosno koza mora voditi registar ovaca odnosno registar koza na gazdinstvu, a sve promjene evidentirati u roku od sedam dana od nastale promjene.

Registar iz stava 1. ovog člana sadrži:

- ime i prezime vlasnika/posjednika životinje, adresu;
- životne brojeve odraslih grla (sve životinje nakon prvog janjenja i jarenja);
- podatke o prometu životinja (datum stavljanja životinja u promet, svrha prometa, broj životinja u prometu i novo stanje broja životinja);
- podatke o izgubljenim odnosno ukradenim životinjama; ako se životinja izgubi ili je ukradena posjednik je dužan u roku od sedam dana o tome izvijestiti ovlaštenu organizaciju.

Član 23.

Nadzor nad provedbom obaveznog označavanja životinja obavljaju federalni i kantonalni veterinarski inspektori, u okviru nadležnosti određene posebnim zakonima.

Član 24.

Oblici pojedinih vrsta propisanih ušnih markica nalaze se u prilogu ovog Pravilnika i čine njegov sastavni dio.

Obrasci potvrda o označavanju domaćih životinja nalaze se u prilogu ovog Pravilnika i čine njegov sastavni dio.

IV. ZAVRŠNE ODREDBE

Član 25.

Ovaj Pravilnik stupa na snagu narednog dana od dana objavljivanja u "Službenim novinama Federacije BiH".


Broj 07-02-139-1/07
novembra 2007. godine
Sarajevo

Ministar
mr. sci. **Damir Ljubić**, s. r.


UŠNA MARKICA ZA OZNAČAVANJE SVINJA

Ušna markica za označavanje svinja žute je boje, oblika izduženog pravokutnika sa zaobljenim vrhovima, najvećih dimenzija 60 x 17 mm. Na prednjoj strani (lice), markica je podijeljena po duljini. U gornjem dijelu je životni broj, veličine znamenki najmanje 6 mm, crne boje, a u donjem dijelu je bar code. Drugi dio ušne markice je okruglog oblika, promjera 30 mm, a na njemu je oznaka FBiH i FMPVŠ

Naličje



Lice markice




UŠNA MARKICA ZA OZNAČAVANJE OVACA I KOZA

Ušna markica za označavanje ovaca je žute, a za označavanje koza bijele boje. Osim u boji, u svim drugim pojedinostima ušna markica za ovce i koze je identična. Ušna markica je plastična, sastavljena od dva dijela jednakih dimenzija, koja se prilikom obilježavanja ovaca i koza spajaju i nakon toga se više ne mogu rastaviti i uporabiti. Ušna markica je pravokutnog oblika i zaobljenih stranica.

Širina ušne markice je najmanje 40 mm, dok je visina najmanje 15 mm.

Na prednjoj strani ušne markice (strana na kojoj se nalazi izdanak-lice) nalazi se životni broj grla i bar code putem kojeg je moguće elektronsko očitavanje životnog broja. Životni broj se sastoji od 9 znamenaka, od kojih je prva znamenka broj entiteta, koji je za Federaciju BiH 2, zatim slijede dvije koje označavaju broj kantona (od 1 do 10) a sljedećih 6 znamenki je progresivni broj obilježene ovce i koze.

Na drugom dijelu ušne markice (poleđina/naličje) upisana je slovna oznaka Federacije BiH (FBiH) i oznaka Ministarstva (FMPVŠ).



Potvrda o označavanju svinja

Prilog 3.

POTVRDA O OZNAČAVANJU SVINJA					
Jedinstveni broj		Ime i prezime vlasnika		adresa	godina
[] [] [] [] [] [] [] [] []		JMBG []		_____	[] [] [] []
Majka: ž.b.		Otac: ž.b.		Datum prašenja	
R/b	Identifikacijski broj grla	spol	R/b	Identifikacijski broj grla	spol
Zaključno s rednim brojem			Označio		
U, dana, godine			mp		
Potvrda o ponovnom označavanju ili označavanju uvezenih svinja					
Zemlja porijekla					
R/b	Spol	Broj koji se mijenja (broj iz zemlje porijekla)		Novi (zamjenski broj)	
1.					
2.					
3.					
4.					
5.					
6.					
Zaključno sa rednim brojem			Označio		
U, dana, godine			mp		

POTVRDA O OZNAČAVANJU OVACA / KOZA**A) PODACI O VLASNIKU OVACA**

IME I PREZIME JMBG ADRESA (ulica, broj, poš. broj, mjesto, općina)

Broj poljoprivrednog gazdinstva _____

B) PODACI O POSJEDNIKU OVACA

IME I PREZIME JMBG ADRESA (ulica, broj, poš. broj, mjesto, općina)

Broj poljoprivrednog gazdinstva _____

C) PODACI O OZNAČENIM OVCAMA

REDNI BROJ	ŽIVOTNI BROJ	PASMINA	SPOL	DATUM ROĐENJA	ŽIVOTNI BROJ MAJKE	ŽIVOTNI BROJ OCA

D) PODACI O OSOBI KOJA JE OBAVILA OZNAČAVANJE

ŠIFRA ORGANIZACIJE IME I PREZIME POTPIŠ OVLAŠTENOG DJELATNIKA